

Tradhis Kebo-Keboan ing Desa Alasmalang lan Tradhis Keboan ing Desa Aliyan Kabupaten Banyuwangi

Sururi Nur Susanti

S-1 Jurusan Pendhidhikan Basa lan Sastra Dhaerah (Jawa), Fakultas Basa lan Seni, Universitas Negeri Surabaya
sururisusanti@mhs.unesa.ac.id

Drs. Sukarman, M.Si.

Dhosen Jurusan Pendhidhikan Basa lan Sastra Dhaerah (Jawa), Fakultas Basa lan Seni, Universitas Negeri Surabaya

Abstrak

Tradhis Kebo-Keboan lan Tradhis Keboan yaiku tradhis kang ditindakake ing loro desa yaiku Desa Alasmalang Kecamatan Singojuruh lan Desa Aliyan Kecamatan Rogojampi. Tradhis iki ana saben setaun sepisan ing sasi Sura. Underan panliten iki yaiku: (1) kepriye mula bukane anane TKK ing desa Alasmalang lan TK ing desa Aliyan, (2) kepriye aspek bentuk lan maknane kang ana ing TKK ing desa Alasmalang lan TK ing desa Aliyan, (3) kepriye wujud komparasi antaraning TKK ing desa Alasmalang lan TK ing desa Aliyan, (4) kepriye upaya palestarian TKK lan TK ing kabupaten Banyuwangi.

Tujuwan panliten, yaiku: (1) ngandharake ngenani mula bukane TKK lan TK, (2) ngandharake aspek bentuk lan maknane kang ana ing TKK lan TK, (3) ngandharake wujud komparasi kang ana ing sajrone TKK ing desa Alasmalang lan TK ing desa Aliyan, (4) ngandharake upaya pelestarian masyarakat lan pemerintah Banyuwangi marang TKK lan TK. Konsep lan teori digunakake ing panliten iki yaiku konsep etnologi budaya. Panliten iki nggunakake ancangan deskriptif komparatif kanthi pendekatan budaya. Dhata ing panliten iki awujud data lesan lan data awujud barang. Tatacara analisis dhata panliten iki nggunakake transkip dhata, verifikasi dhata, idhentifikasi dhata lan penafsiran dhata.

Asile panliten yaiku nuduhake sejarah anane TKK lan TK kang nduweni sesambungan karo dhanyang lan pundhen desa yaiku Mbah Buyut Karti lan Mbah Buyut Wongso Kenongo. Wujud lan makna kang kinandut ing sajrone TKK lan TK ana loro, yaiku tatalaku lan ubarampe. Makna kang kinandut ing sajrone ubarampe lan tatalaku uga nduwane gegayutan marang alam semesta lan Dewi Sri minangka dewi kang dipercaya dadi dewi pari. Wujud komparasi kang tuwuh ing TKK lan TK kaperang dadi rong aspek yaiku aspek kang beda lan aspek kang padha. Banjur upaya kang ditindakake kanggo nglestarikake TKK lan TK yaiku, didadekakeadicara taunan lan festival budaya kabupaten, dikenalake marang masyarakat liya mligine para pamudha, lan pemerintah kudu milu nyengkuyung lan menehi surungan anggone nguri-uri kabudayan ing desa Alasmalang lan desa Aliyan.

Tembung wigati : etnologi, tradhis kebo-keboan lan keboan.

PURWAKA

Bageyan purwaka iki diperinci dadi limang subbab, yaiku (1) landhesane panliten, (2) punjere panliten, (3) tujuwane panliten, (4) paedaehe panliten, (5) watesane panliten, lan (6) panjlentrehe tetembungan. Luwih jangkeping ngisor iki.

Landhesane Panliten

Tradhis kalebu warisan budaya arupa kabiyasan kang mesti ditindakake lan disengkuyung masyarakat wiwit jaman biyen nganti saiki. Tradhis isih ditindakake dening masyarakat utawa klompok masyarakat tartamtu kang ana gayutane karo panguripan. Tradhis bisa ana amarga kabiyasan kang ditindakake lan diterusake saka generasi marang generasi sabanjure, lumantar tulisan (ora lisan) lan tuturan (lisan) supaya bisa njaga lan nglestarikake tradhis. Tradhis minangka perangan saka kabudayaan kang dadi pambeda antarane tradhis ing saben dhaerah. Tradhis kasebut nduweni titikan, wujud, uga makna kang beda sajrone nindakake tradhis kasebut.

Kabudayan nduweni teges sakabehe pamikir lan asil karyane manungsa kanthi sarana pakulinan anggone padha ngangsu kawruh (Koentjaraningrat, 1987:15).

Sajrone kabudayaan uga nduweni titikan kang mirunggan utawa ciri khas. Titikan kang mirunggan ing kabudayan iku dhowe bisa dideleng saka karakteristike, saengga bisa mbedakake kabudayan kang ana ing saben dhaerah. Kabudayan saben dhaerah nduweni makna uga simbol kang beda-beda. Kabudayan kuwi tuwuh lan ngrembaka sajrone panguripane manungsa, uga karipta saka pamikiran manungsa. Manungsa ora bisa urip tanpa anane kabudayan, semana uga kabudayan ora bakal ana tanpa masyarakat panyengkuyunge. Panliten budaya asipat dinamis lan dialektis (Endraswara, 2006:1). Kabudayan nuswantara miturut Sudikan (2001: 4) bisa diperang dadi telu, yaiku kabudayan lokal, kabudayan dhaerah lan kabudayan nasional. Katelu kabudayan kasebut ora bisa uwal saka siji lan sijine, amarga katelune padha nduweni sesambungan. Kabudayan suku bangsa utawa kabudayan dhaerah mujudake asile saklompok manungsa kang kaiket dening *kesadaran*, rasa idhentitas lan anane upaya ndadekake siji budaya kang ana ing dhaerah utawa suku bangsa tartamtu.

Salah sawijining kabudayan kang ngrembaka lan nduweni panyengkuyung kang akeh yaiku kabudayan Jawa. Miturut Sudikan (2001:5) kabudayaan dhaerah

yaiku kabiyanan kang wis dilakoni wiwit jaman biyen kang diwarisake karo para leluhur marang keturunane. Kabudayan diperang dadi telu yaiku kabudayaan lokal, kabudayaan dhaerah lan kabudayaan nasional, saka katelu kabudayan kuwi uga nduweni sesambungan antar kabudayan siji lan sijine. Kabudayaan lokal lan kabudayaan dhaerah kang nduweni pengaruh lan sesambungan kang rumaket banget. Kabudayaan lokal yaiku wujud kagiyatan-kagiyatan panguripan saka warga kang wis dadi bageyane masyarakat kang kasusun saka sawijining suku bangsa, saengga kagiyatan kasebut nduweni pranata-pranata sosial kang sumbere saka kabudayan-kabudayan suku bangsa asline, uga bisa mangaribawani tumrap kabudayaan nasional. Kabudayaan lokal minangka gambaran saka manekawernane budaya kang ana ing dhaerah tartamtu lan minangka idhentitas dhiri sawijining masyarakat. Kabudayaan dhaerah lan kabudayaan lokal nduweni gegayutan kang rumaket banget khususe ing adat istiadat lan tradhisi dhaerah. Adat istiadat bisa diartiake minangka ukum lan aturan kang sumirat uga wis rumaket lan dipercaya dening masyarakat. Salah sawijine masyarakat kang isih nglestariake lan nguri-uri kabudayan lokal lan adat istiade yaiku masyarakat suku Osing ing Banyuwangi.

Suku Osing kalebu suku asli utawa pendhudhuk asli kang manggon lan urip ing Kabupaten Banyuwangi. Suku Osing nduweni basa lokal yaiku basa Osing. Basa Osing lan basa Jawa kang nduweni babon basa kang padha yaiku basa Jawa Kuna nanging basa Jawa lan basa Osing kang ngalami owah-owahan lan proses pangembangan basa kang beda (Harusantosa ing sajrone Syaiful, 2015: 14). Basa Osing lan budaya Osing kang isih dijaga uga ditindakake karo masyarakat suku Osing ing Banyuwangi. Miturut Kepala Bidang Kebudayaan Dinas Pariwisata, suku Osing minangka suku asli Kabupaten Banyuwangi, nanging suku kasebut mung manggon ing dhaerah tengah kabupaten Banyuwangi. Dhaerah kasebut antarane kecamatan Songgon, Glagah, Singojuruh, Rogojampi, Genteng, Giri, Cluring, lan Kabat. Suku Osing kang nganut kapitayan lan ajaran agama Islam, nanging isih percaya ngenani kakuwatan ghoib lan roh leluhure. Lumantar tradhisi lan budaya-budaya kang nduweni gegayutan karo bab-bab kang magis lan mistis. Masyarakat suku Osing kang dikenal dadi masyarakat kang akeh kabudayaan lan tradhisi dhaerah. Salah sawijine tradhisi mistis kang ana ing Banyuwangi yaiku Tradhisi Kebo-Keboan lan Tradhisi Keboan. Tradhisi Kebo-Keboan lan Tradhisi Keboan minangka tradhisi mistis kang isih ditindakake lan dipercaya ing masyarakat Osing. Mula sajrone panliten iki, kang dikaji panliti kanggo ngonceki lan mbedakake tradhisi kang ana ing rong desa yaiku ing desa Alasmalang, kecamatan Singojuruh, lan desa Aliyan, kecamatan Rogojampi, kabupaten Banyuwangi.

Tradhisi Kebo-Keboan lan Tradhisi Keboan kang kalebu warisan budaya saka leluhur kang isih ajeg lan lestari nganti saiki ing kabupaten Banyuwangi. Banyuwangi minangka kabupaten kang manggon ing sisih kidul wetan (*tenggara*) pulo Jawa kang kalebu provinsi Jawa Timur. Banyuwangi kalebu kabupaten kang isih kenthel banget anggone babagan kabudayaan

lan adat istiadat. Masyarakat uga njaga lan nglestariake adat istiadat lan tradhisi kang dadi kabudayan khase. Tradhisi Kebo-Keboan (dicekakake dadi TKK) lan Tradhisi Keboan (dicekakake dadi TK) minangka tradhisi kang wis ana wiwit jaman biyen ing desa Alasmalang lan desa Aliyan kabupaten Banyuwangi. Kebo-keboan lan Keboan kalebu tradisi dhaerah kang isih diuri-uri nganti saiki, uga gawe narik kawigaten para wisatawan asing kang asale saka manca. TKK lan TK kang ditindakake saben wulan Sura ing rong desa yaiku ing desa Alasmalang lan desa Aliyan kang duweni wujud lan titikan kang mirunggan.

Panliten iki bakal ngenceki apa kang ana sajrone TKK lan TK. Bab kang dioncekai ing antranane yaiku ngenani cerita asal mulane TKK lan TK, wujud lan maknan kang kinandut ing sajrone tatalakun lan ubarampe tradhisi, komparasi budaya kang ana ing sajrone TKK lan TK, lan upaya palestarian kang ditindakake karo masyarakat lan pemerintah kabupaten Banyuwangi tumrap TKK lan TK. Adhedhasar sakabehe bab kasebut, mula panliti menehi irah-irahan tumrap panliten iki yaiku *Tradhisi Kebo-Keboan ing Desa Alasmalang lan Tradhisi Keboan ing Desa Aliyan Kabupaten Banyuwangi*.

Panliten iki nggunakane tintingan etnologi budaya lan nganggo teori etnologi konsep bandhingan budaya amarga ing tradhisi iki nduweni titikan mirunggan kang dadi pembeda lan pepadhan antara tradhisi siji lan sijine. Panliten iki kalebu panliten dheskriptif komparatif kang nliti bab kang dadi pepadhan lan pembedane ngenani sawijine kabudayan kang ditujukake marang wujud, makna, tatalaku, pembeda, pepadhan, lan upaya palestarian kang ditindakake masyarakat. Dheskriptif komparatif uga mbandingane loro utawa luwih saka kabudayaan kanthi cara ndeleng panyebabe lan unsur-unsur kabudayaan kang dadi konteks panguripan ing masyarakat.

Underane Panliten

Adhedhasar lelandhesan panliten kang wis diandharake ing dhuwur, mula bisa didudut perkara-perkara kang bakal dioncekai ing panliten iki yaiku:

- 1) Kepriye mula bukane anane TKK ing desa Alasmalang lan TK ing desa Aliyan?
- 2) Kepriye aspek bentuk lan maknane kang ana ing TKK ing desa Alasmalang lan TK ing desa Aliyan?
- 3) Kepriye wujud komparasi antaraning TKK ing desa Alasmalang lan TK ing desa Aliyan?
- 4) Kepriye upaya palestarian TKK lan TK ing kabupaten Banyuwangi?

Tujuwane Panliten

Adhedhasar underane panliten ing ndhuwur bisa ditemokake tujuwan panliten kaya ing ngisor iki:

- 1) Ngandharake ngenami mula bukane TKK ing desa Alasmalang lan TK ing desa Aliyan.
- 2) Ngandharake aspek bentuk lan maknane kang ana ing TKK lan TK.

- 3) Ngandharake wujud komparasi kang ana ing sajrone TKK ing desa Alasmalang lan TK ing desa Aliyan.
- 4) Ngandharake upaya pelestarian masyarakat Banyuwangi marang TKK lan TK.

Paedahe Panliten

Asile panliten ngenani ing TKK lan TK kang dilakoni karo loro desa yaiku, desa Alasmalang, kecamatan Singojuruh, lan desa Aliyan kecamatan Rogojampi, kabupaten Banyuwangi iki nduweni patang paedah, yaiku:

- 1) Nglestarekake kabudayan Jawa mligine TKK lan TK ing kabupaten Banyuwangi
- 2) Menehi lan nambahi kaweruh ngenani TKK lan TK kang ana ing loro desa anggone nglakokane ing siji kabupaten kang nduweni makna lan maksut padha, kanggo inventarisasi lan kanggo golek nilai budaya sarta kanggo ndudhah nilai budaya lan kearifan lokal.
- 3) Sarana kanggo ngleluri lan nglestarekake kabudayan Jawa saka warisan leluhur TKK lan TK ing kabupaten Banyuwangi.
- 4) Kanggo dhokumentasi, mligine tumrap masyarakat desa Alasmalang lan desa Aliyan ing babagan kabudayan amrih tansah dijaga lan diururi supaya bisa dimengerteni kabeh dhaerah saka sajabene desa Alasmalang lan desa Aliyan.
- 5) Sumbangan *referensi* kabudayan Jawa tumrap piwulangan basa Jawa ing sekolah-sekolah.

Watesane Panliten

Wewatesan kang dikarepake ing sajrone panliten iki yaiku supaya pamaos bisa mengertenin lan ora menehi tapsiran liya ngenani kasile panliten iki. Amarga kang dadi objek paliten iki ana ing rong panggonan kang beda desa lan beda kecamatan. Tujuwan saka anane wewatesan panliten iki supaya ora uwal lan trep saka konsep kang wis karonce saka wiwitinan ngantik pungkasan. Wewatesan prakara iki yaiku:

- 1) Ngrembug babagan mula bukane TKK ing desa Alasmalang lan TK ing desa Aliyan.
- 2) Aspek bentuk lan makna tartamtu kang ana ing sajrone tatalaku TKK lan TK
- 3) Studi bandhingan utawa komparasi budaya kang mbandhingake antara TKK ing desa Alasmalang lan TK ing desa Aliyan saka mula bukane, faktor kang dadi panyebe lan dipercayane dening masyarakat gunakake konsep lan teori etnologi budaya.
- 4) Upaya kanggo nglestarekake TKK lan TK ing kabupaten Banyuwangi.

TINTINGAN KAPUSTAKAN

Panliten Kang Saemper

Fungsi panliten kang saemper sajrone panliten yaiku kanggo nggoleki teori lan kajian kang pada uga bisa dadi pambeda antarane panliten kang wis ana karo panliten kang durung ana. Saliyane kuwi uga bisa mbandhingake panliten kang wis ana karo panliten kang arep ditiliti lumantar objek, teori, lan kajian. Panliten

saemper kang ngrembug babagan ngenani tradisi iki wis ana lan akeh jinise. Kayata Tradisi Sinongkelan ing Desa Prambon Kecamatan Tugu Kabupaten Trenggalek (Tintingan Budaya) kang ditiliti dening Rama Ditya Pranandha Yudha (2017). Asile saka panliten ngandharake mula bukane Tradisi Sinongkelan sing asale saka Wewaler Kanjeng Sinongkel supaya saben taun ing sasi Sela dina Jemuwah Legi dianakake bersih desa maksude bersih desa iku gawe bersihé badani para manungsa secara lair lan batin. Ngandharake tatarakite Tradisi Sinongkelan kang awujud nyadran utawa bersih desa, ngandharake wujud, lan maknane saka ubarampe ing Tradisi Sinongkelan.

Panliten saemper kapindo yaiku panliten kang ditiliti dening Agnes Dina Sari (2014) ngenani Kesenian Bantengan ing Tlatah Kabupaten Kediri lan Kabupaten Mojokerto (Antropologi Simbolik) Panliten iki ngandharake babagan mula bukane seni bantengan saka seni silat/olah kanuragan bela dhiri, tatarakit lan tatalakune kang kudu dilakokake ing panggonan amba lan tinarbuka uga dipengeti saben acara-acra tartamtu mligine ing Kabupaten Kediri lan Kabupaten Mojokerto.

Panliten kang katelu yaiku "Kesenian Banthengan Mojokerto Kajian Makna Simbolik dan Nilai Moral" (2013) dening Ruri Darma Desprianto saka Pendhidhikan Sejarah UNESA. Panliten iki ngrembug babagan sejarah anane kesenian banthengan ing desa Claket Kecamatan Pacet Kabupaten Mojokerto, makna simbolik lan nilai moral, sarta pamase masyarakat Mojokerto anggongning nglestarike kesenian Banthengan.

Panliten sabanjure yaiku kanthi judul "Mantra dalam Upacara Adat Kebo-Keboan Masyarakat Using Banyuwangi (2011) dening Febriyanti Ade Terina saka Pendhidhikan Bahasa dan Seni UNEJ. Panliten iki ngandharake makna lan gayutane mantra kang digawe nalika nglakoni upacara kebo-keboan. Mantra kang digawe nalika nglakoni upacara adat kebo-keboan dianggep mistis lan sakral, kang dipercaya para masyarakat nduweni sesambungan karo panguripan sabanjure.

Saka andharan lan jlentrehan panliten uga kasile panliten kanggo mbedakake panliten sadurung karo panliten saiki, yaiku objek panliten kang ditiliti. Objek kang ditiliti ing panliten iki yaiku tradisi kebo-keboan ing kabupaten Banyuwangi kang kaperang dadi loro yaiku TKK ing desa Alasmalang lan TK ing desa Aliyan kang akhire nuuhake komparasi budaya. Konsep kang gegayutan karo punjering panliten yaiku konsep kabudayaan, konsep masyarakat lan etnisitas Jawa, konsep folklor, konsep tradisi lan adat istiadat, konsep bandhingan, konsep semiotik, lan konsep pelestarian budaya kang ana gegayutane karo irah-irahan sing ditiliti. Panliten iki nduweni punjeren ing sejarah dilaksanakake TKK lan TK, makna lan bentuke tatalaku uga ubarampe, aspek komparasi arupa pambeda lan pepadhane TKK lan TK, lan upaya pelestarian budaya kang ditindakake masyarakat lan pemerintah ing kabupaten Banyuwangi marang TKK lan TK. Panliten iki durung tau ditiliti dening mahasiswa Pendhidhikan Basa Lan Sastra Jawa, utawa ing jurusan liya kang ana ing Fakultas Basa Lan Seni uga ing Fakultas liya ing UNESA.

Konsep Budaya

Budaya kang asale saka basa Sansekerta “*buddayah*” saka wujud jamak budhi sing tegese budi utawa akal (Koentjaraningrat, 2004:72). Kabudayan yaiku tembung kang gegayutan karo kabeh sistem gagasan, tumindak lan asil karyane manungsa ing sajroning masyarakat. Manungsa minangka makhluk kang ngiringi lumakune wektu uga seneng nglakoni uji coba saka prakara-prakara anggone ngalahake alam semesta kanthi cara sinar ngenani bab-bab tartamtu, supaya bisa ngasilake budaya lan kesenian kang luhur. Dene miturut pamawas estimologi kabudayan yaiku bab-bab sing nduweni gegayutan karo budi lan pamikiran manungsa (Koentjaraningrat, 2002: 80).

Miturut Sudikan (2001:4) diperang dadi telung jinis, yaiku: (1) kabudayan suku bangsa utawa budaya dhaerah. (2) kabudayan umum utawa lokal, lan (3) kabudayan nasional kang tuwuh amarga masayarakat Indonesia sarujuk marang kabudayaan kasebut. Kabudayan utawa budaya kang ana lan bisa tuwuh amarga anane unsur-unsur universal kang dadi panyurungan anane kabudayaan ing sajrone panguripan.

Unsur-unsur kabudayan kasebut kaperang dadi pitung unsur antaraning: (1) bahasa; (2) sistem religi utawa kapittayan; (3) sistem pengetahuan lan pendhidhikan; (4) sistem kemasyarakatan utawa organisasi masyarakat; (5) sistem ekonomi lan mata pencarian; (6) sistem teknologi lan peralatan, lan (7) sistem kesenian (Koentjaraningrat, 1990: 203-204). Pitung unsur iku dadi pambeda lan menehi ciri khas tartamtu ing sajrone kabudayan kang ana ing saben-saben dhaerah. Saka pitung unsur mau bisa diperang maneh dadi sepuluh kabudayaan utawa budaya ing masyarakat Jawa khususe wilayah Jawa Timur. Saka asil panliten kang dilaksanakake Sutarto lan Sudikan (2008:1-2) budaya ing wilayah jawa timur kaperang dadi sepuluh jinis wilayah budaya antarane: budaya Mataraman, budaya Panaragan, budaya Arek, budaya Samin, budaya Tengger, budaya Osing, budaya Pandalungan, budaya Madura Pulo, budaya Madura Bawean, lan budaya Madura Kangean. Sepuluh wilayah kabudayaan ing Jawa Timur kang ana lan bisa dibedakake saka pitung unsur universal kang diandharake Koentjaraningrat.

Tradisi lan Adat Istiadat

Tradisi kanthi *etimologis* tegese yaiku adat pakulinan kang wis diwarisake dening para leluhur kang isih ditindakake dening masyarakat lan pambiji utawa anggepan yen cara-cara kang wus ana lan ditindakake karo masyarakat minangka cara kang paling becik lan trep (Tim Penyusun, 2003: 1208). Miturut Poerwadarminta (1939: 1069) tradisi, yaiku sakabehing adat, kapitayan, lan liya-liyane kang wis diwarisake karo para leluhur lan isih ana uga ditindakake dening masyarakat. Mula adat bisa arupa tindakan samubarang kang wis dadi pakulina ing saben dina kang ana ing masyarakat uga wis diwiwitni ing jaman biyen ngantri saiki isih dilaksanakake lan diugemi.

Tradisi minangka piranti kang ana kango njangkepi panguripane masyarakat uga ngrewangi lancar

ngrembakake saben pawongan. Saka andharan iki njlentrehake yen tradisi minangka budaya kang sipate luhur lan diturunake karo para leluhur ing sajrone masyarakat, kang sipate amba uga bisa ngrembaka karo lingkungan alam lan majune jaman. Kaya dene TKK lan TK kang ana ing Banyuwangi, minangka tradisi kang luhur lan diturunake marang generasi sabanjure.

Konsep Masyarakat lan Etnis Jawa

Masyarakat utawa kumpulanung pawongan kang mbentuk kelompok kang manggon lan urip ing panggonan tartamtu uga nglakoni kagiatan tartamtu. Masyarakat uga mbentuk sistem semi katutup ing sajrone panguripan ana kadadean intreaksi sosial kang ditindakake karo individu lan individu, individu lan kelompok, kelompok lan kelompok utawa etnis. Etnis artine suku bangsa kang kaperang saka ras lan *trah* (*garis keturunan*). Miturut Koentjaraningrat (1990: 144) masyarakat yaiku kumpulanung manungsa kang nglakoni interaksi sosial lan pasrawungan. Manungsa kasebut uga nduweni rasa nyawiji lan prasarana kang digunakake karo para wargane kanggo nglakoni interaksi sosial. Tembung masyarakat asale saka tembung basa Arab “syaraka” ateges mula cawe-cawe. Mula bisa ditegesi yen masyarakat minangka kumpulanung manungsa ing panggonan tartamtu bisa diarani masyarakat. Salah sawijine masyarakat kang urip ing Banyuwangi kang diarani Etnis Osing utawa suku Osing.

Suku Osing kang dipercaya dadi suku asli kang manggon ing Banyuwangi. Osing miturut pamawas etimologis asale saka tembung “sing utawa hing” kang tegese “ora” (Daru Suprapta ing sajrone Sutarto 2008:133), kang nduweni maksud ngenani pawongan kang ora gelem ninggalake wilayah Blambangan kang saiki dadi kabupaten Banyuwangi nalika ing jaman semana ana perang Puputan Bayu anggone golek aman lan luwih slamet (Azizah, 2014:26). Banjur saka kadadean kuwi pawongan kang isih manggon ing wilayah Blambangan iku diarani wong Osing utawa “wong sing ora gelem ninggalake bumi kelairane” anggone golek aman saka uberen para penjajah.

Konsep Etnologi Budaya

Etnologi budaya yaiku cabang ilmu saka antropologi kang nyinaoni lan neliti babagan kabudayan kang ana ing sajrone etnis utawa suku bangsa saka sudut pandang komparatif lan historis. Miturut Endraswasa (2015: 1) etnologi yaiku ilmu kang nyinaoni *perbandhingan* antara budaya saka mula bukane utawa cerita sejarah, tujuwan anane kabudayaan, sikap sosial lan kajiwane masyarakat tumrap kabudayan kang ana ing dhaerah tartamtu mligine ing budaya Jawa, dadi sarana kanggo nliti bangsa saka sisi budaya Jawa diarani etnologi Jawa. Carane mahami objek panliten kang dadi pambeda lan pepadha kang sumber saka *perbandhingan*, ora bisa ngandharake yen *relativistic* ora nduweni titik temu marang komparasi.

Etnologi dhewe asale saka tembung *ethnos* kang nduweni arti bangsa, lan *logos* kang artine ilmu pengetahuan, sahingga etnologi yaiku ilmu kang nyinaoni ngenani bangsa, suku bangsa, lan budaya kang ana uga

isih dilaksanakake ing sajrone suku bangsa. Etnologi utawa ilmu etnis kang nyinaoni babagan pambeda lan pepadhan kabudayan kang ana ing saben suku bangsa lan masyarakat ing saben dhaerah tartamtu, miligine ing masyarakat Jawa. Etnologi nliti budaya kang ana ing sawijining etnis utawa suku bangsa kanthi cara komparatif kanthi tujuwan supaya bisa mangerten i ngenani cerita sejarah lan proses evaluasi sarta panyabarane kabudayan kasebut.

Konsep Bandhingan Budaya

Budaya siji bisa dibandingkake karo budaya liyane, gunakake bandhingan budaya. Bandhingan budaya digunakake kango nemokake aspek kang memper diarani varian. Varian kang ditemokake bisa nuntun sepira adohe pepdhan lan pambeda ing budaya kang diteliti (Endraswara 2015: 75). Bandhingan utawa luwihi dikenal komparasi, komparasi asale saka basa Inggris *compare*, tegese mbandhingkake anggone bisa nemokake pepadhan lan pambedane saka loro utawa luwihi saka objek kang diteliti (Depdikbut, 1997: 515). Dene miturut Nazir (2005: 58) bandhingan utawa komparasi yaiku panliten dheskriptif kang nliti ngenani sebab akibat, faktor-faktor kang dadi panyebabe bisa anane tradhisi utawa ritual tartamtu kang ana ing sajrone masyarakat.

Bandhingan budaya sipate retai, relativitas budaya bisa digunakake kango mahami lan mangerten i maneka wernane budaya kang ana ing saben-saben etnis utawa suku bangsa. Sajrone panliten budaya manekawenane aturan kang ana ing budaya bisa dadi pambeda yaiku nalika ana sawijining kadadean ing masyarakat arupa fenomena kang kudu dicatat utawa dadi variasi-variasi kang diarani realitivisme. Lan keragaman ora mung disawang saka fenomena utawa kadadean tartamtu nanging kudu diteliti lan dilanjtrehake kanthi cetha (Endraswara, 2015: 77). Bandhingan budaya asring mraktekake transferabilitas, utawa proses mindhahake unsur-unsur budaya tartamtu marang budaya liyane kang nduweni unsur pepadhan. Bandhingan budaya kang sipate relatif dadi condhong ing penggolongan lan nyajiale dhata kanthi cara tartamtu kang ndadekake dhata kasebut bisa dimangeteni tumrap saben individu.

Konsep Simbol lan Makna

Budaya Jawa kang kebak marang simbol, mula etnologi jawa bisa dienggo kango nliti aspek simbol lan mistik kejawen (Endraswara, 2015: 2). Ora bedha karo andhrane C.Kluckon ing sajrone Koentjaraningrat (1990: 190-199) yen sajrone panguripane manungsa kebak marang kabudayan khas ing sajrone sistem budaya kang nggunakake simbol minangka piranti kango nitipake pesen, makna, utawa piweling tumrap mayarakat kang dadi panyengkuyunge. Kabudayan lan manungsa sejatiné nduweni sesambungan kang rumaket amarag kabudayan kang ngandhut makna, nilai, uga pamikiran manungsa minangka pangripta. Simbol utawa tandha kudu dipahami uga dimangerten i kanthi pener lan bener, mula anggone menehi pangerten i ngenani simbol gunakake teori semiotik.

Teori semiotik yaiku teori kang ngandharake babagan simbol lan tandha kang diwenehake marang

piranti-piranti tartamtu. Anggone mangerten i lan mahami simbol-simbol kang ana ing sajrone tradhisi nggunakake perangan kayata: (1) tandha iku dhewe, (2) bab kang ditandhani, (3) sawijining tandha anyar kang dumadi ing batine sing nampa (Luxemburg, 1992: 46).

Upaya Ngelstariake Budaya

Nglestariake budaya utawa luwihi dikenal nguri-uri budaya yaiku upaya kang ditindakake masyarakat tumrap kabudayan tartamtu kang wis ana lan diwiwiti ing jaman biyen, supaya ora mungkret lan sansaya ilang. Koentjaraningrat (2010: 185-189) ngandharake telung unsur upaya kango nguri-uri utawa nglestariake kabudayan yaiku 1) Internalisasi utawa upaya nguri-uri kabudayaan nganggo rasa kang dinduweni manungsa antarane yaiku hasrat, nafsu, lan emosi uga manungsa nduweni sipat ora bakal puas saengga bakal kawujud rasa nguri-uri utawa nglestariake saka awake dhewe lan tradhisi. 2) Sosialisasi utawa proses kang wis ditindakake kanthi cara turun temurun kang wis dilaksanakake saka jaman biyen nganti saiki. Lan 3) Enkulturasi utawa pengaruh saka masyarakat liya kang melu nyengkuyung tradhisi kanthi apik lan melu nglestariake kabudayan dhaerah kasebut.

Lelandhesan Analisis

Konsep kang kapisan yaiku konsep etnologi kang diandharake Haviland. Haviland (sajrone Endraswara 2015: 2) ngandharake babagan etnologi kang kudu perspektif holistik, maksute yaiku para panliti kang nyinaoni babagan etnologi kudu bisa mahami lan mangerten i budaya etnis kanthi cara komparatif kanthi tujuwan bisa mengerten i babagan sejarah anane tradhisi ing saben etnis lan proses evolusi uga panyebaraning budaya ing dunya.

Konsep kapindho yaiku nintingi bab aspek bentuk lan makna ing sajrone tandha arupa simbol kang ana sajrone tatalaku lan ubarampe TKK lan TK. TKK lan TK kudu dilaksanake ing desa Alasmalang lan desa Aliyankang nggunakake piranti ubarampe lan urut-urutan tatalaku kang mirunggan kango diteliti kanthi jero. Konsep lan teori kang digunakake kango ndhudhah makna lan simbol kang tuwu lan dipercaya dening masyarakat nggunakake teori semiotik kang diandharake Pierce. Teori semiotik yaiku teori kang ngandharake babagan simbol lan tandha kang diwenehake marang piranti-piranti tartamtu. Anggone mangerten i lan mahami simbol-simbol kang ana ing sajrone tradhisi nggunakake perangan kayata: (1) tandha iku dewe, (2) bab kang ditandhani, lan (3) sawijining tandha anyar kang dumadi ing batine sing nampa (Luxemburg, 1992: 46). Saka telung faktor iku bisa nemtokake tandha ing sawijining makna.

Konsep katelu yaiku konsep etnologi budaya kang diandharake Endraswara lan konsep bandhingan budaya. Miturut Endraswara (2015: 1) etinologi yaiku ilmu kang nyinaoni *perbandhingan* antara budaya saka mula bukane utawa cerita sejarah, tujuwan anane kabudayaan, sikap sosial lan kajiwane masyarakat tumrap kabudayan kang ana ing dhaerah. TKK lan TK uga nduweni crita asal mulane ritual tradhisi kasebut bisa ana lan kalaksanan.

Saka crita kang ana lan dipercaya dening masyarakat desa TKK lan TK gawa pengaruh sosial lan kajiwane masyarakat kanggo nglestariake kabudayan. Bandhingan budaya digunakake kanggo nemokake aspek kang memper diarani varian. Varian kang ditemokake bisa nuntun sepiro adohe pepdhan lan pambeda ing budaya kang diteliti (Endraswara 2015: 75).

Konsep kapapat yaiku upaya masyarakat desa Alasmalang lan desa Aliyan anggone nglestarian kabudayan dhaerah arupa TKK lan TK kang wis ana wiwit jajan biyen, nggunakake andharan saka Koentjaraningrat (2010: 185-189) kang merang dadi telung unsur upaya kanggo nguri-uri utawa nglestariake kabudayaan yaiku 1) Internalisasi utawa upaya nguri-uri kabudayaan nganggo rasa kang dinduwéni manungsa antarane yaiku hasrat, nafsu, lan emosi uga manungsa nduwéni sipat ora bakal puas saengga bakal kawujud rasa nguri-uri utawa nglestarekake saka awake dhewe lan tradhisi. 2) Sosialisasi utawa proses kang wis ditindakake kanthi cara turun temurun kang wis dilaksanakake saka jaman biyen nganti saiki. Lan 3) Enkulturasikan utawa pengaruh saka masyarakat liya kang melu nyengkuyung tradhisi kanthi apik lan melu nglestariake kabudayan dhaerah kasebut.

TATA CARANE PANLITEN

Ing panliten kanthi irah-irahan “*Tradhisi Kebo-Keboan ing Desa Alasmalang lan Tradhisi Keboan ing Desa Aliyan Kabupaten Banyuwangi*” nggunakake metode deskripsi komparatif. Arikunto (2013: 310-311) njlentrehake ngenani panliten kang nggunakake methode dheskriptif komparatif yaiku panliten kang bisa nemokake pepadhane lan pambedane ngenani samubarang, pawongan, kadadeyan, idhe-idhe tumrap wong kanggo sawijining panliten. Dheskriptif komparatif panliten mbandhingake loro utawa luwih saka kadadeyan kanthi cara ndeleng panyebabe lan unsur-unsur kabudayan kang dadi konteks panguripan ing masyarakat. Dheskriptif komparatif budaya kang digayutake karo aspek *historis* utawa sejarah bisa dadi titikan kang mirungan saka studi bandhingan lan etnologi budaya.

Panliten komparatif ing adicara TKK lan TK asipat *dheskriptif*, amarga dhata kang diasilake awujud tetembungan lan saperangan gambar uga makna kang ngandhut ana ing adicara TKK lan TK. Dhata yaiku katrangan utawa bahan nyata sing bisa didadekake dhasar kajian. Wujude dhata yaiku bisa lesan utawa tulisan kayata cathethan lan rekaman asile wawancara karo informan (Lofland sajrone Moleong, 2011: 157) ing sajrone panliten tradhisi iki bisa dijupuk dhata arupa lisan lan gambar. Dhata kang arupa lisan bisa diarani *informasi lisan* saka *informan*. Dhata kang arupa gambar bisa diarani *dhokumentasi*, dhata iki kuwat banget kanggo njlentrehna lan tanggung jawab panliten marang apa kang wis ditiliti.

ANDHARAN ASILE PANLITEN

4.1 Gegambaran Desa Alasmalang Lan Desa Aliyan

Sadurunge ngrembug ngenani TKK lan TK luwih jero, panliti luwih dhisik njletrehake ngenani gegambaran alam ing desa Alasmalang lan desa Aliyan nggunakake dhata etnografi kang asale saka Kantor Balai Desa Alasmalang lan Kantor Balai Desa Aliyan. Panulisan kahanan alam desa lan gayutane kahanan desa lan tradhisi.

4.1.1 Kahanan Alam Desa Alasmalang lan Desa Aliyan

Panggonan geografis perlu diandharake kanggo mangerteni kahanan desa lan kabudayan dhaerah kang isih diuri-uri, kang arep diteliti lan kanggo mangerteni wates panggonan desa kang nglakoni tradhisi kasebut. Dhata *Etnografi* iki dijupuk saka Kantor Balai Desa Alasmalang lan Desa Aliyan. Desa Alasmalang lan desa Aliyan minangka tangga desa nanging beda kecamatan kang isih nguri-uri TKK lan TK.

Desa Alasmalang manggon ing kecamatan Singojuruh, winatesan langsung karo desa Singojuruh ing sisih kulon, desa Lemahbang Kulon ing sisih elor, desa Benelan Kidul ing sisih wetan, lan desa Gambor ing sisih kidul. Balai Desa Alasmalang kang manggon ing Jl. Ahmad Yani no.3 dusun Karangasem, desa Alasmalang. Kanthi cara geografis tlatah desa Alasmalang ana ing sisih kulon, saka kutha kecamatan Singojuruh watara 2,5 Km lan saka kabupaten Banyuwangi 19 Km. Desa Alasmalang nduwéni jembar tlatahe 300.590 Ha/m².

Desa Aliyan yaiku salah sijine desa kang manggon ing kecamatan Rogojampi kabupaten Banyuwangi. Desa iki winatesan langsung karo desa Gambor ing sisih kulon, sisih elore desa Bubuk, sisih wetane ana desa Mangir, lan sisih kidule ana desa Parijatah. Balai Desa Aliyan kang manggon ing Jl. Tawangalun no. 2001 desa Aliyan. Kanthi cara geografis tlatah desa Aliyan ana sisih kidul saka kantor kecamatan lan kabupaten. Jarak kang kudu diempuh saka kutha kecamatan Rogojampi watara 6,2 Km lan saka kabupaten Banyuwangi 11 Km. Jembare tlatah Desa Aliyan miturut data Monografi taun 2018 nduwéni jembar 6.137.195 Ha/m². Jembare lahan ing desa Aliyan kaperang dadi fasilitas umum, pemukiman, tetanen utawa sawah, kebon, area lahan garing, lan area lahan liyane. Ambane tlatah kanggo lahan sawah kang tumata lan kasusuran rapi sakabehe gunakake saluran irigasi saka kali Bomo.

4.1.2 Gegayutane Kahanan Desa lan Tradhisi

Gegambaran desa Alasmalang lan desa Aliyan nduwéni pangribawa kang gedhe tumrap kapitayane masyarakat kang wis turun-temurun. Kapitayan iku bisa ndadekake masyarakat gelem njaga kahanan alam sakupenge. Tumindak masyarakat saben dinane bisa uga kaprabawan karo critane TKK lan TK. Njaga kahanan alam minangka sawijine wujud ngrembakake tradhisi kasebut, amarga papan iku dadi sawijine cikal bakal anane crita lisan arupa crita ngenami tradhisi ing desa Alasmalang lan Aliyan. Gegayutane TKK lan TK karo desa yaiku alat perantara kanggo ngucapake rasa syukur dumateng Gusti Kang Maha Agung kang sampun maringi

kasil panen kang akeh, ruwat desa, lan kanggo upacara bersih desa utawa tolak balak supaya desa diaduhake saka malapetaka lan bebayan.

Gegambaran alam desa Alasmalang lan desa Aliyan uga nduweni gegayutan karo TKK lan TK. Gegayutane yaiku tatalaku lan ubarampe kang digunakake dening masyarakat nalika dedonga sadurunge nindakake TKK lan TK minangka asil saka tetanem masyatakat desa Alasmalang lan desa Aliyan. Banjur masyarakat desa Alasmalang lan desa Aliyan uga nduweni pangribawa kang gedhe marang Dewi Sri lan para dhanyang ing desane nalika nindakake TKK lan TK. Masyarakat desa Alasmalang lang desa Aliyan minangka salah sawijine masyarakat kang ngrembakakake TKK lan TK supaya isih ana ing jaman saiki lan ora ilang kagerus jaman.

Saliyane kahanan alam uga ana wujud pangupajiwa masyarakat desa Alasmalang lan desa Aliyan uga nduweni pangribawa tumrap TKK lan TK. Pangupajiwa masyarakat kang luwih akeh nyambut gawe dadi tani, guru, pejabat lan liya-liyane iki wigati banget anggone nguri-uri lan nglestariake kabudayan kang ana ing dhaerahe. Gegayutane yaiku masyarakat bisa njupuk paedah saka TKK lan TK kang migunani tumrap panguripan utamane marang pangupajiwane.

Para pamong desa kudu nduweni pangribawa kang gedhe supaya bisa ngrembakake tradhisi kasebut amrih ora ilang. Para pamong desa kudu menehi tuladha marang generasi mudha supaya gelem nguri-nguri tradhisi kang dumunung ing desane. Babagan pendhudhuk ing desa Alasmalang lan desa Aliyan uga nuduhake kahanan kang isih bisa ngugemi kabudayan, mligine tumrap TKK lan TK. Babagan iki bisa dideleng saka masyarakat kang isih percaya lan nindhakake adat istiadat uga tradhisi kaya dene nalika saben ana tradhisi slametan, lanadicara mantenan utawa kithanan masyarakat isih kerep ngirim sesajen lan pandonga ing Gusti Kang maha Kuwasan lan para dhanyang desa lumantar TKK lan TK supaya lancar lan ora ana alangan. Babagan pendhidhikan sajrone masyarakat uga nduweni daya pangribawa tumrap TKK lan TK. Kanthi pendhidhikan kang dhuwur masyarakat Alasmalang lan Aliyan mligine bisa ndadekake tradhisi kasebut ngrembaka maneh.

Kahanan sabanjure yaiku kahanan pendhudhuk, pendhudhuk desa Alasmalang lan desa Aliyan isih akeh kang ngugemi budaya lan tradhisine. Pendhudhuk desa Alasmalang lan desa Aliyan yen TKK lan TK iki minangka ritual tradhisi kang paling utama lan wajib dianakake saben setaun sepisan. Kahanan kasebut mbuktikake yen pendhudhuk desa Alasmalang lan desa Aliyan isih perdhuli marang TKK lan TK. Saka cacahe pendhudhuk kang ana ing desa Alasmalang lan desa Aliyan, kang nduweni rasa perdhuli lan seneng marang TKK lan TK yaiku para sesepuh tuwa. Supaya para kaula mudha ora lali lan ninggalake kebudaya kasebut. Para sesepuh tua utawa wong kang wus tuwa kudu bisa ngajak para kawula mudha supaya nduweni kawigaten supaya ora ngilangi kabudayan kang adiluhung. Miturut pendhudhuk desa Alasmalang lan desa Aliyan TKK lan TK minangka cara kango mujudake rasa syukur marang

Gusti Kang Maha Kuwasan kang paring asil panen, rahmat, keslametan lan keayem tentreman ing desa Alasmalang lan desa Aliyan.

Tingkat pendhidhikan uga nduweni kalungguhan kang wigati ing jaman saiki. Warga desa Alasmalang rata-rata pendhidhikan lulusan SMA lan desa Aliyan rata-rata pendhidhikan lulusan SD nanging uga ana sing lulusan perguruan tinggi. Kahanan kasebut ndadekake TKK lan TK isih ngrembaka ing desa Alasmalang lan desa Aliyan amarga anane pamikiran saka pendhudhuk kang tansah ngrembakakake tradhisi kasebut. Senajan pendhidhikane warga desa kasebut ora dhuwur nanging isih gelem ngeluri kabudayan Jawa. Nanging ora kabeh wong tansah ngrembakakake budayane, uga ana kang nglewakake kabudayan ksebut.

Agama lan sistem kapitayan ing desa Alasmalang lan Aliyan nduweni gegayutan kang raket tumrap TKK lan TK. Pendhudhuk desa kang mayoritas nganut agama Islam kejawen lan islam abangan percaya marang crita TKK lan TK. Saengga masyarakat isih nglakoni tradhisi salah sijine slametan tumpengan kanggo tolak balak upama masyarakat desa Alasmalang lan Aliyan arep nganakake hajatan mantenan utawa resik desa ora ana alangan saka wiwitinan nganti pungkase acara. Canggihe teknologi ing jaman saiki bisa dimanfaatke para pamudha desa lan panyengkuyung budaya kanggo nyiarake crita lan ngletrariake budaya TKK lan TK, salah sijine lewat internet, media sosial, media masa lan media liyane.

4.2 Mula Bukane TKK Desa Alasmalang Lan TK Desa Aliyan

Saben tradhisi lan ritual kang ana ing sajrone bebrayan, mesthi ndhuwuni crita mula bukane tradhisi kabebut kang asale saka kapitayane para masyarakat desa kasebut. Kaya dene tradhisi kang ana ing desa Alasmalang lan desa Aliyan kang ndhuwuni crita miturut versi lan kapitayane masyarakat desa.

4.2.1 Mula Bukane TKK Versi Desa Alasmalang

Jaman biyen masyarakat desa Alasmalang kena musibah penyakit kang ora bisa ditambani kang disebut brindeng utawa pageblug. Penyakit iki ora ana obate lan tambane, nalika ana warga kang kena penyakit iki ing wayah isuk banjur ing wayah sorene mati, kaya ngono suwaliike. Saliyane kena musibah penyakit kuwi masyarakat Alasmalang kang palih akeh wargane nyambut gawe dadi tani pada bingung amarga udan kang suwe ora teko, tanduran kang ditandur ora ana menehi kasil, pari padha dipangan ama wereng lan tikus, akhire gagal panen.

Saka kadedan kuwi Mbah Buyut Karti minangka sesepuh desa golek dalan amrih bisa metu saka musibah pagebluk lan serangan ama. Banjur Mbah Buyut Karti nglakoni semedi ing dhuwur gumuk ing Watu Lasa. Watu kang wujude kaya klasa kang amba lan manggon ing dhuwure gumuk cilik ing desa Alasmalang anggone golek dalan supaya bisa metu masalah kang ana ing desane.

Nalika nglakoni semedi dheweke oleh wangsit supaya nglakoni ritual arupa ruwat desa kang diarani Kebo-Keboan. Ritual kasebut kanggo mulyakake

sakabehane bab ngenani tetaneman lan wujud pakurmatan marang Dewi Sri. Dewi Sri kang dipercaya dadi simbol kasuburan lan kamakmuran. Dimaksud kebo-keboan yaiku saperangan pawongan kang macak kaya dene kewan kebo lan ora lali uga tingkahe. Nalika nindakake TKK para wargane padha kesurupan roh leluhur utawa dhanyang kang manggon ing pondhen Alasmalang.

Tradisi iki milih kewan kebo amarga kewan iki nduweni gayutan kang rumaket karo wong tani. Kebo kang digawe ora kewan kebo asli, nanging manungsa kang macak kaya dene kewan kebo. Wong tani ing jaman biyen isih ngunakane tenagane kewan kaya dene kebo, sapi, lan kewan kang kalebu kewan rajakaya anggone ngolah sawah lan tandhurane. Manungsa kang macak kaya kewan kebo minangka wujud pralambang saka hubungane kewan kebo lan manungsa kang kudu dijaga lan dilestariake. Sakawak kang diwenehi werna ireng saka areng kang digerus lan dicampur karo lenga klapa ora lali sungu kebo. Saka loro piranti kuwi gambarake simbol yen kewan kebo kang dadi kancane para wong tani anggone nglakoni kagiyanan saben dinane ing sawah.

4.2.2 Mula Bukane TK Versi Desa Aliyan

Dukuh Karang Mukti utawa desa Aliyan kalebu desa kang subur, makmur, lan asile panenan kang akeh. Nalika kuwi dukuh Karang Mukti utawa desa Aliyan ngalami musibah tandurane para warga desa diserang ama wereng, tikus, lan pageblug akhire para tani gagal panen. Simpenan pari ing lumbung saya suwe saya entek amarga ora ana asil panenan kang disimpel maneh. Akhire warga desa pada keluwen, Ki Buyut Wongso Kenongo saben bengi golek dalan anggone bisa metu saka musibah pagebluk kang nglandha desane. Ing sawijine wengi Ki Buyut Wongso Kenongo oleh wangsit saka impene. Supaya kaloro anake yaiku Joko Pringgo lan Joko Pekik kudu nglakoni tapa lan tirakat ing alas kang ana ing dukuh Karang Mukti. Joko Pringgo tapa ing alas sisih kulon kang diarani dusun Sukodono, dene Joko Pekik tapa ing alas sisih kidul ing Gumuk Suko Pekik.

Sabubare Joko Pringgo lan Joko Pekik oleh wangsit saka nglakoni tapa lan tirakat ing alas desa. Dheweke metu lan ninggalake papan panggonan anggone nglakoni tapa. Ing tengah dalan nalika ninggalake panggonan tapa Joko Pringgo lan Joko Pekik kanthi ora sadar dheweke mlayu ing sawah kang blethok jemek lan akeh endhut. Banjur dheweke gulung-gulung kaya dene kewan kebo kang lagi gotheh ing tengah sawah. Para warga kang weruh padha gumun lan bingung marang tingkah polahe rong pamudha kang wis kaya kebo lan wis gluprut endhut banjur digiring ing omahe Ki Buyut Wongso Kenongo. Ing tengah dalan warga desa lan pamuda kang gluprut endhut kuwi ketemu karo wong tuwa sing macak kaya wong edan nanging sipate kang santun lan nduweni tata krama kaya dene pawongan biyasa.

Satekane ing omah Ki Buyut Wongso Kenongo baru ngerti yen pawongan kuwi ora wong biyasa, nanging wong kang sekti. Pawongan kuwi banjur nyuwun petang iket pari jawa utawa pari ketan, anakan gedang raja, janur kuning, lan cikal, kanggo nyadarne wong sing digiring karo warga desa digawa ing omahe Ki Buyut Wongso

Kenongo. Wong edan kuwi kang ngomongi yen loro pawongan kuwi anake Ki Buyut Wongso Kenongo yaiku Joko Pringgo lan Joko Pekik kang lagi kesurupan.

Saka kadadean kuwi Ki Buyut Wongso Kenongo mangerten maksut saka wangsit ing impine lan pesene wong tuwa kang macak kaya wong edan. Warga desa Aliyan supaya nglakoni upacara lan ritual bersih desa saben setaun sapisan ing wulan Suro, kanggo ngunjukake rasa syukur tumrap Gusti Kang Maha Agung. Amarga wis menehi asil panen lan ngaduheke saka bebayan. Miturut pethikan andharan wawancara saka informan ngenani kadadean kang dialami dening Ki Buyut Wongso Kenongo warga desa kudu nglakoni tradisi Keboan setaun sepisan ing wulan Sura.

4.3 Aspek Bentuk Lan Makna Kang Kinandhut ing TKK lan TK

TKK lan TK minangka ritual taunan lan ritual magis. Diarani mangkono jalaran ritual iki ana sesambungan karo bangsa lelembut kang diarani dhanyang. TKK lan TK kang kudu ditindakake dening warga Alasmalang lan Aliyan kang nduweni makna supaya diparingi asil panen kang sae. Saliyane kuwi TKK lan TK uga nduweni fungsi kanggo acara bersih desa nalika ing wulan Sura. aspek bentuk lan makna kaperang dadi rong sabbab yaiku:

4.3.1 Aspek Bentuk kang Kinandhut ing TKK lan TK

Aspek bentuk kang kinandhut ing TKK lan TK ngandharake ngenani tatalaku lan ubarampe kang ana ing sajrone tradisi TKK lan TK.

4.3.1.1 Tatalaku TKK lan TK

Tatalaku minangka sawijining perangan kang wigati sajrone adipara tartamtu. Tatalaku yaiku kabiyasan kang dianggep dadi tatacara anggone nglakoni jejibahan tartamtu kang wis ditrima lan dadi kaidah-kaidahe aturan kang wis dipercaya uga dilakoni ing sajrone panguripan ing masyarakat. Tatalaku utawa urut-urutan kang dilakoni ing sajrone tradisi. Urut-urutan TKK lan TK.

1) Slametan Pambuka

Slametan pambuka ditindakake warga desa ing wayah sore utawa bengi nalika ing malem siji Sura. Slametan pambuka minangka slametan kang kawiwitana utawa pambuka, tembung pambuka tegese *mulai*. Slametan pambuka minangka slametan kang ditindakake sadurunge kagiyanan kang inti dilaksanakake, slametan pambuka arupa slametan ijab kobul lan kirim dengo kanggo nyuwun pangestu tumrap leluhur desa lan para dhanyang anggone bisa miwiti kagiyanan TKK lan TK.

2) Mbangun Gapura Palawija

Gapura minangka lawang pakarangan kang ngarahake ing dalan kang bisa dilihat lan dadi dalan mlebu ing desa utawa dhusun kang nglakoni tradisi. Gapura utawa lawang iku digawe saka pring lan diwenehi janur, digunakake kanggo ngantung asil bumi arupa palawija, palapendhem, lan sajinise. Ing sajrone TKK lan TK kang ditindakake ing rong desa uga mbangun gapura kang isine manekawarna

palawija antarane pala kependhem, pala gumantung, lan pala kesimpur kang diasilakake alam desa.

Gapura palawija utawa lawang kori minangka wujud gegambaran marang subur lan makmure alam desa Alasmalang lan desa Aliyan. Gapura palawija kang dibangun ing patang penjuruh arah angin. Gegambaran rejeki kang tekane saka patang penjuruh arah angin yaiku elor, kulon, kidul, lan wetan

3) Atur-Atur

Atur-atur utawa ater-ater yaiku kagiyatan kang mesti ana nalika ritual TKK lan TK ditindakake. Ater-ater asale saka tembung ater kang tegese paweweh sega salawuhane, lan pangangan liyane kang diaturake utawa diaterake tumrap tangga sakiwa tengene lan para paseduluran. Nalika ana acara slametan, tahlilan, lan acara liya-liyane masyarakat Jawa mesti nindakake tradisi atur-atur utawa ater-ater. Tradisi atur-atur nduwensi gegayutan kang rumaket banget karo masyarakat Osing. Ing Alasmalang lan Aliyan para wargane isih nduwensi sesambungan paseduluran tunggal buyut kang wis manggon siji desa. Masyarakat desa Alasmalang lan desa Aliyan nalika acara atur-atur para wargane ewuh anggone gawe lan ngolah panganan kanggo diaturake marang paseduluran liyane.

4) Slametan Latar

Slametan latar kang ditindakake karo masyarakat Alasmalang lan Aliyan ing endi para masyarakat nglakoni slametan kirim dunga lan mangan bareng karo para warga desane. Acara slametan diiwiti kanthi cara dunga bebarengan kanthi lungguh sila ing ndhuwure klasa utawa tikar kang digawe lelandesane panggonan lungguh, ngupengi sega tumpeng dibacutake acara dhahar bareng. Slametan latar minangka gegambaran warga desa kang isih jaga karukunan lan rasa kekeluargaan kang isih tetep dijaga supaya lestari ora ilang kegerus jaman. Rasa paseduluran lan kekeluargaan kang isih ngrembaka ing sajrone panguripane masyarakat desa, iku minangka titikan kang mirunggan kang dadi pambedane antarane pawongan kang urip desa lan kutha. Dhahar bareng minangka salah sawijining tatalakuadicara slametan latar. Adicara dhahar bareng wis mesti dilaksanake amarga tradisi iki uga kalebu acara wujud rasa syukur marang jagad lan Gusti Pengeran kang wis menehi rejeki

5) Ider Bumi Kebo-Keboan lan Keboan

Ider bumi kang tegeseadicara keliling desa utawa nglilingi area panggonan urip, yaiku panggonan-panggonan kang ana gayutane karo upacara. Ider bumi ditindakake kanthi cara arak-arakan keliling desa kang disengkuyung karo sakabehane masyarakat Osing kang manggo ing dhaerah kang nglakoni ritual TKK lan TK. Ider bumi ngandhut kapitayan religius amarga nalika nglakoni kagiyatan arupa upaya-upaya sosial kamasyrakatan lan kirim dungs kanggo nyuwun kasejahteraan lan kaselamatan kanggo masyarakat desa. Ing sajrone panguripane para masyarakat agraris utawa tani yaiku

rupa pangarep-areap supaya diwenehi lemah kang subur, nyegah saka serangan ama, ngasilake panen kang nglimpah, lan nyegah sakabehe malapetaka.

6) Ngurit

Ngurit minangka urut-urutan adhicara TKK lan TK kang paling pungkas. Kagamarake nalika ana sepasang pawongan kebo lan keboan kang nggawa singkal banjur nyemplung ing guyangan nglakoni singkal sawah, dadi pangongan kanggo nyebar winih pari utawa ngurit pari. Disusul paraga Dewi Sri lan pawang kang nglakoni ngurit utawa nyebar winih ing guyangan. Ritual ngurit kalebu ritual pungkas ing ngendi adhicara iki gabah disebar ing dalan, lan guyangan. Sadurunge ngurit ditindakake para wong tani lan tokoh adat nggawa pelaku kebo lan keboan sapasangane kanggo nindakake semai. Ngurit minangka proses kang penting anggone nglakoni nandur pari. Ngurit minangka proses kang wiwit anggone nindakake tetaneman sabubare garap utawa nyingkal sawah. Ngurit kang artine nyebar winih pari ing papan panggonan kang diarani kedhokan kang wis rampung disingkal.

4.3.1.2 Ubarampe TKK lan TK

Ubarampe utawa piranti kang digunakake ing sajrone tradisi utawa ritual kang wis ana lan ngrembaka ing masyarakat Jawa. Ubarampe kang dimaksud yaiku panganan, lelawuhan, lan piranti-piranti tartamtu kang diaturake marang dhedhuwuran (Gusti Pangeran) nalika nduwe gawe utawa ing ritual tartamtu. Ubarampe kang digunakake ing sajrone tradisi TKK lan TK maneka werna macem lan bentuke kang ndhuwensi makna-makna tartamtu ing sajrone tradisi. Ubarampe kang digunakake ing sajrone tradisi iki antarane, yaiku gapura palawija utawa lawang kori, beras pitung tawar, peras, sekul arum, tumpeng gecok gempol, tumpeng panca warna, dawet, pacul lan wakul, menyan lan dupa, kembang setaman, gunungan asil bumi, miniatur kewan sawah, pasangan singkal lan garu, guyangan lan gabah.

4.3.2 Makna kang Kinandhut ing TKK lan TK

Makna kang kinandhut ing sajrone tatalaku lan ubarampene TKK lan TK iku ana gayutan karo olah pamikire masyarakat Jawa utawa filsafat Jawa. Tatalaku lan ubarampe kang ana ing sajrone tradisi ora mung digawe-gawe utawa ana gayutane karo bangsa alus lan sapanunggalane. Tatalaku lan ubarampe kang wis gumathok wiwit biyen, nanging ana piranti uga tatalaku kang beda amarga kapitayan saben masyarakat desa kang beda. Tatalaku lan ubarampe kang beda minangka wujud kapitayan lan pasarujukane masyarakat desa wiwit jaman biyen kang isih dipercayaan nganti saiki. Tatalaku lan ubarampe kang ana ing sajrone saben-saben tradisine wong Jawa, minangka wujud pramlambange saka rasa syukur marang Gusti Kang Maha Agung kang sampun maringi rejeki lan asil bumi kang akeh. Tatalaku kanggo nggelar sawijineadicara kudu nggatekake urut-urutan yaiku persiapan lan pelaksanaane. Makna kang kinandhut ing

sajrone tatalaku lan ubarampe ing TKK lan TK bakal diandharake ing ngisor iki.

1) Slametan Latar

Slametan pambuka arupa slametan ijab kobul lan kirim dengo kanggo nyuwun pangestu tumrap leluhur desa utawa para dhanyang anggone miwiti kagiyatan TKK lan TK. Maknane saka slemtan iki yaiku para warga desa kang nyuwun idin lan nyuwun pangestu marang Gusti Pengeran lumatar para dhayang desa. Supaya nalika nindakake kebo-keboan lan keboan diparingi slamet lan lancar saka wiwitan ngantri pungkasan.

2) Mbangun Gapura Palawija utawa Lawang Kori

Gapura palawija utawa lawang kori minangka wujud gegambaran lemah kang subur lan makmure alam desa Alasmalang lan desa Aliyan. Gapura palawija utawa lawang kori kang diwangun ing patang penjuruh arahe angin utawa tekane angin. Gegambarane rejeki kang tekane saka patang penjuruh arah angin yaiku elor, kulon, kidul, lan wetan. Makane saka mbangun gapura palawija utawa lawang kori iki kanggo nglambangake lemah desa kang subur.

3) Atur-Atur

Atur-atur minangka wujud rasa syukur warga desa marang asil bumi. Ing sajrone tradhisi atur-atur ana telung sipat kang dilakoni warga desa Alasmalang lan desa Aliyan yaiku gupuh, lungguh, lan sungguh. Tegese telung tembung kuwi yaiku gupuh, warga desa padha gupuh anggone nyolah lan nyiapake panganan saka asil bumi. Menawa engko ana dulur adoh kang nyambangi ing desa. Lungguh utawa “kampe sulung” tegese mampir disik, dulur adoh kang wis teko ing desa utawa omahe warga desa banjur dikon leren lan lungguh kanggo nikmati asil bumi kang wis diolah. Suguh, tegese asil bumi kang wis diolah banjur disuguhake marang tamu utawa dhayoh kang mampir ing omahe warga desa.

4) Ider Bumi Kebo-Keboan lan Keboan

Ider bumi kang tegese keliling desa utawa nglilingi areal tempat tinggal, lan panggonan-panggonan kang ana gayutane karo ritual. Ider bumi ditindakake kanthi cara arak-arakan keliling desa kang disengkuyung karo sakabehane masyarakat Osing kang manggo ing daerah kang nglakoni ritual TKK lan TK. Ider bumi ngandhut kapitayan religius amarga nalika nglakoni kagiyatan arupa upaya-upaya sosial kemasyrakatan lan kirim donga kango nyuwun kesejahteraan lan keselamatan kanggo masyarakat desa

5) Ngurit

Ngurit minangka proses kang paling wiwitan anggone nglakoni tetaneman sabubare garap utawa nytingkal sawah. Ngurit kang artine nyebar winih pari ing kedhokan kang wis rampung disingkal. Ngurit minangka cikal bakale nandur pari kang maknane kanggo ngarepake asil panen kang akeh. Sawah kang wis disingkal karo pak tani lan digawe kotheh karo para pelaku kebo lan keboan banjur para bu tani utawa wanita tani nyebar winih pari kang digawa ing wakul.

Urut-urutan tatalaku kang ana ing sajrone TKK lan TK kang nduweni makna miturut saka kapitayan lan filosofi Jawa. Ora lali uga ubarampe kang digunakake ing

TKK lan TK miturut kapitayan lan makna filosofi Jawa. Ubarampe utawa piranti sesajen kang digunakake ing sajrone tradhisi utawa ritual ing masyarakat. Sesajen yaiku wujud asil bumi arupa wit-witan, woh-wohan, lan liya-liyane kang diasilake alam. Kaya dene andharan ubarampe ing ngisor iki:

1) Gapura Palawija utawa Lawang Kori lan Gunungan Asil Bumi

Gapura palawija utawa lawang kori lan gunungan asil bumi kang digawe uga diwangun karo warga desa Alasmalang lan desa Aliyan, minangka wujud gegambaran rasa syukur kang ditrima warga desa marang asil bumi kang diwenehi dening Gusti Kang Maha Agung. Asil bumi kang maneka warna jinis lan manfaate kanggo warga desa diwangun lan digawe gunungan uga gapura palawija. Gapura palawija utawa lawang kori lan gunungan asil bumi minangka simbol saka kamakmurah lan kasuburane alam desa Alasmalang lan Aliyan kang bisa nuwuhake maneka warna palawija lan asli bumi kang ditandur ing desa kasebut. Gapura palawija utawa lawang kori kag dipasang ing petang arah penjuru desa nduweni makna simbolik yaiku kanggo lawang lan dalam metune sakabehane mala petaka lan kadadean ala, sarta dalam mlebu kabecikan kang bakal ditrima warga desa. Gapura palawija lan lawang kori minangka ubarampe tolak balak kang diciptakake kalian warga desa Alasmalang lan Aliyan.

2) Tumpeng lan Ancak

Tumpeng kang asale saka tembung “tumungkulo sing mempeng” kang tegese nalika kita nduweni kapringinan utawa pangarep-arep kudu ditindakake kanthi mempeng lan tenanan nalika nggayuh kapringinan lan kudu eling marang karsane Gusti Kang Makarya Jagad. Tumpeng nduweni arti kang dawa yaiku tumapaking panguripan tumindak lempeng tumuju Gusti Pangeran.

Tembung “tumpeng” sajrone basa Jawa tumuju ing lepeng marang Gusti Pengeran. Nalika nindakake adhicara kasebut wis mesthi ana tumpeng gandhengane nganggo ancak, ateges tumpeng dianggep nduweni gegayutane manungsa marang Gusti Pengeran, banjur ancak utawa tumpeng cilik ngibaratake gegayutane manungsa marang manungsa liyane. Anane tumpeng ing satengahe masyarakat wis lumrah amarga asring digunakake ing upacara adat.

3) Petetheng

Petetheng utawa ingkung kang asale saka tembung “ingsun lan kung (manekung)”. Tembung ingsun nduweni arti aku, tembung manengkung nduweni arti ndonga kanthi khidmat. Pitik ingkung nduweni makna manungsa nyembah Gusti Allah kanthi khusuk (manekung) lan ati kang wening.

4) Urabyan

Urabyan utawa urapan uga bisa ditegesi sumber panguripan ana ing alam ndonya kayata tetuwuhan kayata kacang lanjaran kasebut nduweni makna lan simbol beda-beda. Urap-urap utawa urabyan saliyane menehi simbol panguripan uga ana simbol urup lan urap kang tegese, urup nalika nglakoni panguripan ing alam dunya kudu mangerteni urip bebarengan lan

tulung-tinulung marang sapadha-padha. Dene urap kang tegese nalika urip ing sajrone bebrayan kudu rawung marang sapadha-padha.

5) Jenang Sengkala lan Jenang Sura

Jenang sengkala utawa jenang abang kang nduweni makna lan ana gayutane karo panguripan, saliyane kuwi uga ana jenang sura kang wujute putih lan lawuhe. Jenang sengkala lan jenang sura minangka simbol lan tandha kang mesti ana ing tradisi jawa. Jenang sengkala kang kasusun saka rong werna yaiku werna abang lan putih kang tegese wujud rasa syukur marang Gusti Pengerahan amarga wis diparingi rejeki lan didohake saka tumindak ala.

6) Kembang Setaman

Kembang setaman yaiku kembang campur werna-werni kang digawe nyekar utawa sajen nalika nglakoni TKK lan TK. Jinise kembang setaman yaiku kembang kenanga, kembang kanthil. Kembang mawar, lan kembang mlati. Kembang setaman kang nggambareke kaendahan lan wangine kembang akeh pawongan padha nyenengi arume kembang setaman.

Simbol kembang setaman yaiku kembang kang ambune wangi minangka pralambang kautaman, utawa simbol kang nuduhake kautaman saka kembang, yaiku wangine kang diduwensi kembang. Kautaman kembang bisa dideleng saka wujude kang maneka werna, wernane kang endah lan ambune kang wangi.

7) Jajan Pasar

Jajan pasar kuwi mujudake maneka werna jajanan lan samubarang kang didol ana ing pasar. Jajanan pasar saliyane nduweni teges ing ndonya iki manungsa ngadhepi masalah kang werna-werna. Nanging jajan pasar uga nduweni guna utawa makna yaiku sawijine pangajab marang Gusti Kang Maha Agung. Supaya pinaringan berkah saka karsane. Kanthi anane berkah bisa cukup kango sakabehane kabutuhan masyarakat Desa ing Alasmalang lan Aliyan.

8) Miniatur Kewan Sawah

Miniatur kewan sawah digawe uga nduweni makna kango ngusir kewan-kewan ama kang senengane ngerusak tandurane wong tani ing taun sabanjure. Kewan sawah kang digawe saka glepung bakal dirusak lan diancurake karo pawongan kang kesurupan dhanyang utawa roh leleuhur desa kang dipercaya warga desa dadi leluhure. Kang nduweni maksud supaya kewan kang senengane ngrusak lan gawe rugine para wong tani bisa ilang lan ora mangani tanduran.

Miniatur kewan sawah kang nduweni makna wujud pralambange kewan sawah, kang senengane ngrusak tanduran kang ditandur ing sawah karo para wong tani. Kewan sawah kang digawe ora mung kewan ama nanging uga sakabehane kewan kang urip ing sawah lan mbantu wong tani anggone ngrumat sawah kaya dene kebo, ulo, lele, lan liya-liyane. Kewan-kewan sawah kang digawe saka glepung beras lan dikukus kuwi bakal dirusak lan diancurake karo para pelaku kebo lan keboan.

9) Kinangan

Kinangan minangka ubarampe kang penting lan mesti ana ing sakabehan tradisi ing Jawa. Kinangan miturut pandhang filosofi Jawa minangka kabiyasane wong Jawa kango nyedhakake dhiri dening Gusti Kang Maha Agung lan njaga tuturane supaya ora ngucap ukara-ukara kang ala.

Nginang minangka kabiyasan kang wis ana wiwit biyen supaya manungsa sing urip ing dunya iki sadar yen bakal bali ning Gusti Kang Maha Agung. Nginang kang nduweni makna arupa campuran rasa kang ana ing saben-saben ubarampe kinangan mulai saka rasa sepet, kecut, pait, pedes, legi lan asin. Ubarampe kang ana ing sajrone kinangan antrane, godong suruh, gambir, enjet, gambir, jambe, lan bako kang digawe susur. Nalika nginang utawa mamah kinangan idu lan cangkep bakal dadi abang wernane. Werna abang kang negesake wani lan suci. Nginang ing tradisi iki maknane saben manungsa kudu wani nglakoni saben-saben tindakan kanthi wani lan ati kang suci, ikhlas, lan trep manteb.

10) Dawet

Dawet yaiku minuman tradisional khas Jawa kang asale saka tepung beras utawa beras ketan kang diwenehi werna ijo saka godong pandan suji, banjur disajiake nggunakake santen saka klapa lan gula abang kang wis dicairake. Dawet kang ana ing sajorane TKK lan TK yaiku wujud simbol saka sumbere banyu. Banyu kang nyumber saka langit lan sajrone lemah, bakal menehi panguripan kanggo makhluk kang urip ing sakupenge sumber banyu kang mili terus gawa panguripan.

11) Beras Pitung Tawar

Beras pitung tawar yaiku beras kang asale saka beras werna putih kang direndem nganggo campuran kunir kang wis diparut lan diperes dijupuk sarine. Beras kuning pitung tawar minangka wujud simbol kemakmurane lan rejeki kang ditrima para warga desa.

Beras kuning pitung tawar kang wis disebar lan disawur-sawurake dening pelaku kebo utawa keboan uga nduweni makna yaiku supaya warga masyarakat desa Alasmalang lan Aliyan tansah pinaringan rejeki lan kemakmurane saka TKK lan TK kang dilaksanake ing rong desa. Beras pitung tawar minangka piranti kang wajib ana nalika TKK lan TK ditindakake. Sarampunge adhicara ider bumi para pelaku kebo lan keboan disadarakake nggunakake beras pitung tawar kuwi. Beras pitung tawar digunakake supaya para pawongan kang ngalami kesurupan bisa cepet sadar lan para roh leluhur utawa para dhanyang bisa bali.

12) Menyan lan Dupa

Menyan lan dupa minangka piranti kang penting ing sajrone tradisi masyarakat kang ditindakake ing tanah Jawa. Menyan lan dupa minangka salah sijine wujud ubarampe TKK lan TK kang diobong nalika masyarakat nglakoni slametan latar lan ider bumi. Menyan lan dupa kerep digunakake karo masyarakat Jawa kango nindakake upacara ritual lan tradisi tartamtu kang ana sesambungane karo bab kang mistik. Menyan lan dupa kang digunakake ing sajorane

tradhisi iki amarga anane pengaruh saka ajaran agama hindu lan islam kejawen kang wis ana lan ngrembaka ing masyarakat Jawa.

Menyan lan dupa kang digunakake ingadicara TKK lan TK iki nduwensi makna kanggo mujudake rasa syukur lan ngilangi saka bebayakang kurang apik tumrapadicara TKK lan TK nalika lumaku

13) Pasangan Singkal lan Garu

Pasangan yaiku tata rakitan piranti angkul-angkul kang dipasangane ing kewan kebo utawa sapi kanggo nggered singkal lan garu. Pasangan singkal lan garu kalebu piranti kang penting nalika nglakoni TKK lan TK. Pasangan singkal lan garu minangka simbol kang dadi pratandhane masyarakat Osing kang masyarakatate paling akeh nyambut gawe dadi petani kang jaga lan percaya yen dheweke urip lan ngolah asil bumine para leluhur utawa dhanyang lan percaya marang kakuwatan kang diasilake pundhen

14) Guyangan

Guyangan kang asale saka tembung “guyang+an” kang tegese panggonan kanggo ngedusi kewan. Guyangan ing TKK lan TK wujud uga gunane kang ora bedha adoh karo guyangan biyasane, yaiku kanggo kewan kebo nderum lan kumkung supaya bisa ngilangi rasa panas kang dirasakake ing awake kewan kebo. Guyangan wujud simbol saka panggonan kanggu ngurit gabah sadurunge ditandur ana sawah gabah diurit lan disemai dadi pari banjur ditandur.

15) Gabah

Gabah ubarampe kang penting nalika garap sawah lan nandur pari. Gabah minangka winih pari kang bakal disebar ing guyangan. Guyangan miturut warga desa Aliyan yaiku papan panggonan kang wis diolah kebo nalika kotheh. Gabah yaiku wiji pari kang wis digiling lan dipisahake saka damen utawa merang. Gabah minangka piranti kang penting banget nalika miwiti tetaneman pari.

Wiji pari kang dipilih kanggo winih yaiku wiji pari kang wis dipisahake saka damene banjur dipepe nganti garing kanggo ngelongi banyu kang ana ing sajrone wiji pari. Nalika wiji pari utawa gabah wis siap digawe banjur digawa lan disebar kanggo winih nalikaadicara ngurit ing guyangan. Gabah utawa wiji pari kang wis sumebar ing sadhuwure guyangan banjur para pelaku kebo lan keboan gulung-gulung ing ndhuwure gabah kang wis disebar ora lali para warga masyarakat uga milu rebutan wiji pari. Masyarakat desa uga percaya yen bisa ngolehake wiji pari kang disebar ing paspas lan guyangan kasebut bisa dadekake tandhurane apik, subur, lan ngasilake gabah kang apik ing panenan sabacute. Gabah utawa wiji pari miturut kapitayan warga desa Alasmalang lan desa Aliyan minangka wujude Dewi Sri saka tanduran pari kang malih dadi wiji pari.

4.4 Wujud Komparasi TKK lan TK

Komparasi utawa bandhingan tegese mbandhingake anggone bisa nemokake pepadhan lan

pambedane saka loro utawa luwih saka objek kang diteliti. Miturut Nazir (2005: 58) bandhingan yaiku panliten kang nliti ngenani sebab akibat, faktor-faktor kang dadi panyebabe bisa anane fenomena tartamtu kang ana ing sajrone masyarakat.

Etnologi budaya minangka konsep lan teori kang trep kanggo ndhudhah bandhingan kang ana ing budaya. Miturut Endraswasa (2015: 1) etinologi yaiku ilmu kang nyinaoni *perbandhingan* antara budaya saka mula bukane utawa cerita sejarah, tujuwan anane kabudayaan, sikap sosial lan kajiwane masyarakat tumrap kabudayan kang ana ing dhaerah. TKK lan TK uga nduwensi crita asal mulane ritual tradhisi kasebut bisa ana lan kalaksanan. Saka crita kang ana lan dipercaya dening masyarakat desa TKK lan TK gawa pengaruh sosial lan kajiwane masyarakat kanggo nglestariake kabudayan.

Bandhingan budaya asring mraktekake transferbilitas, utawa proses mindhahake unsur-unsur budaya tartamtu marang budaya liyane kang nduwensi unsur pepadhan lan pambeda kang siapte transferbilitas. *Transferibilitas* budaya yaiku proses mindhahake unsur-unsur budaya tartamtu marang budaya liyane kang nduwensi unsur pepadhan lan pambeda. Saka anane *transferibilitas* budaya iki bisa nguwatake pepadhan lan pambeda anataraning budaya lan tradhisi siji lan sijine kang ana ing sajrone masyarakat. Bandhingan budaya kang sipate relatif dadi condhong ing penggolongan lan nyajiake dhata kanthi cara tartamtu kang ndadekake dhata kasebut bisa dimangeteni tumrap saben individu. Sajrone TKK lan TK ana saperangan aspek kang dadi wujud komparasine bakal diandharake ing ngisor iki.

4.4.1 Aspek kang Beda

Sajrone TKK lan TK ana kang dadi pambedane kaperang dadi saperangan unsur. Mulai saka ana 1) jenenge ritual tradhisi, 2) cerita sejarah mula bukane TKK lan TK, 3) sipate ritual TKK lan TK, 4) dhanyang, 5) pundhen utawa tapal watese alam dunya lan alam ghoib, 6) wektu nglakoni, 7) pelaku kebo-keboan lan keboan, 8) kostum, 9) urutan tatalaku, lan 10) ubarampe kang digunakake nalika nglakoni tradhisi. Saka unsur-unsur kang dadi pambeda kuwi banjur masyarakat bisa mangerteni endi sing diarani kebo-keboan lan endi sing diarani keboan. Kaya dene ing desa Alasmalang tradhisi iki diarani tradhisi kebo-keboan amarga pelaku tradhisi macak kaya dene kewan kebo. dene ing desa Aliyan diarian tradhisi keboan ing endi oara pelaku kesurupan lan sipate kaya dene kewan kebo.

Aspek pambedane bisa kadudut saka faktor kang dadi panyebabe lan dipercayane dening masyarakat desa. Faktor kang dadi panyebabe, yaiku saka crita mula bukane tradhisi kang beda, dhanyang lan pepundhen, uga saka kapitayane masyarakat ana kang sakral lan ora sakral. Keboan kang isih sakral lan ana owah-owahan saka tatalaku utawa ubarampene. Banjur nggawa pengaruh kanggo desa Alasmalang anggone mindakake kebo-keboan. Keboan kang dilaksanake luwih disik kanthi cara nekani makame Buyut Wongso Kenanga lan para dhanyang desa banjur ider bumi utawa keliling desa Aliyan. Dene kebo-keboan kang ditindakake kanthi cara para warga desa kang mangkat saka petaunan nuju ing pepundhen watu Lasa, ing pepundhen kuwi banjur para

wargane menehi sajen lan pawange maca mantra kanggo nyeluk roh leluhur lan para dhanyang.

4.4.2 Aspek kang Padha

Aspek kang dadi pepadhané Tradisi Kebo-Keboan lan Tradisi Keboan bakal diandharake ing ngisor iki:

- 1) Tradisi kebo-keboan lan Tradisi keboan dilakoni saben setaun sepisan.
- 2) TKK lan TK kang dilakoni ing Banyuwangi nalika sasi Suro kang nduweni makna lan tujuwan anggone nglakoni tradisi iki, yaiku slametan desa lan ngucap puji syukur marang Gusti Kang Maha Agung amarga sampaun maringi asil panen kang nglimpah lan akeh.
- 3) Kanggo njunjung Dewi Sri kang dipercaya masyarakat Jawa minangka Dewi kesuburan lan kemakmuran, kang wis njaga lan maringi rejeki kanggo tandhuran ing sawah.
- 4) Tujuwan ditindakake tradisi iki padha-padha kanggo nyuwun udan, kanggo kasuburan, panen kang akeh, kaendar saka musibah paceklik, tolak balak lan slametan desa, kanggo ngucap puji syukur marang Gusti Kang Maha Agung amarga sampaun maringi asil panen kang nglimpah lan akeh, uga ora lali kanggo njunjung Dewi Sri kang dipercaya masyarakat Jawa minangka dewi kesuburan lan kemakmuran.
- 5) TKK lan TK ana gayutane karo tetaneman.
- 6) Ritual kebo-keboan lan keboan bisa ana amarga desa Alasmalang lan desa Aliyan kena musibah pageblug, pacelik, lan gagal panen kang suwe.
- 7) TKK lan TK padha-padha nggunakake wujud simbol lan sipate kewan kebo, nanging ora nggunakake kewan kebo asli.
- 8) TKK lan TK padha-padha nggunakake lan nyeluk para dhanyang desa kangi dadi tradisi iku dadi mistik.

Aspek pepadhan antarane TKK lan TK ngandharake yen tradisi kang nduweni jeneng beda nanging isih ana gegayutane lan sesambungane nalika tradisi kasebut tuwuhan utawa dhaerah kang padha.

Kebo-keboan wis didadekake agenda resmi lan taunan karo pemerintah kabupaten Banyuwangi kebo-keboan luwih dikenal tinimbang keboan. Keboan ing desa Aliyan kang isih dijaga kesakralane lan ora ana owah-owahan nalika nindakake tradisi wiwit jaman biyen nganti saiki. Nanging kebo-keboan ing desa Alasmalang kang wis ora sakral maneh lan ana owah-owahan tatalaku uga ubarampene kang wis tumuta apik kaya dene acara festival dhaerah. Tataurutane Kebo-keboan kang wis mlenceng adoh lan ngalami akeh owah-owahan saka tata urutane ing jaman biyen. Para warga desane kang wis nganggep tradisi iki dadi festival taunan kang ditindakake ing desane.

4.5 Upaya Pelestarian TKK lan TK

Tradisi TKK lan TK kang ana ing Banyuwangi naté ilang lan *vacum* amarga ana peraturan pemerintah

kang nglarang tradisi dhaerah dilaksanakake. Banjur Para warga desa lan pemerintah kabupaten gawe upaya pelestarian supaya tradisi kang wis ana lan dipercaya dening masyarakat Banyuwangi. *Kerjasama* kang ditindakake dening pemerintah lan masyarakat desa bisa nglakokake TKK lan TK kang *vacum*.

Sakabehane masyarakat Banyuwangi wiwit saka cilik, gedhe, mudha, lan tuwa milu nyengkuyung kabudayaan dhaerah kang dadi ciri khas dhaerah Banyuwangi. Saliyane para warga masyarakat desane uga saka pihak pemerintah lan pemerhati kabudayaan dhaerah kang milu nyengkuyung. Banjur gawe festival-festival tartamtu kanggo nglestariake budaya dhaerah kang ana ing saben-saben desa lan kecamatan.

Upaya palestarian TKK lan TK kang ditindahake warga desa Alasmalang lan desa Aliyan bebarengan karo upaya kang ditindakake pemerintah bakal diandharake miturut pamawase Koentjaraningrat (2009: 185-189) kang kaperang dadi telu, ing ngisor iki:

1) Internalisasi

Internalisasi minangka salah sawijine cara kanggo nglestariake kabudayaan kang tuwuhan saka awake dhewe yaiku saka ati lan pikirane manungsa. Upaya nglestariake kabudayaan nganggo rasa kang tuwuhan saka awake dhewe. Rasa kasebut antarane yaiku hasrat, nafsu, lan emosi uga manungsa nduweni sipat ora bakal puas saengga bakal kawujud rasa nguri-uri utawa nglestariake saka awake dhewe lan tradisi. Manungsa nduweni rasa ora bakal puas saengga bisa ndadekake manungsa kasebut pengen mangertené lan ngenali tradisi kang dadi warisan budaya lan kabiyanan kang diturunake saka leluhure.

Rasa kang tuwuhan saka awake dhewe bakal nyurung upaya kanggo nginauni lan nglestariake budaya dhaerah. Yen atine wis mantep kepengin sinau lan mangertené budaya Jawa bakal bisa nglestarekake budaya kanthi rasa seneng lan bungah.

2) Sosialisasi

Sosialisasi minangka sistem proses sosial kang tuwuhan ana ing masyarakat kang bisa biyantu masyarakat lan pawongan tartamtu gelem nyinaoni lan mangertani tradisi kanthi cara sosialisasi. Mangaertené budaya Jawa kanthi cara sosialisasi yaiku omong-omongan ngénani tradisi lan budayadhaerahe dhewe-dhewe mula saka kuwi tradisi bisa dilakoni kanrhi turun-temurun. Kanthi cara omong-omongan lan sosialisasi masyarakat bisa sambung sinambung, oleh lan nrima informasi saka pawongan liya.

3) Enkulturasí

Saliyane saka awake dhewe lan sosialisasi faktor kang bisa nglestarekake kabudayaan dhaerah yaiku anane masyarakat anyar utawa pawongan liya lan para pihak pemerintah kang bisa ndukung tradisi dhaerah. Faktor kasebut bisa njalari ngrembakane TKK lan TK amarga yen masyarakat anyar lan pihak pemerintah melu nyengkuyung adicara bisa ndadekake masyarakat lokal sadar marang anane tradisi kasebut lan melu nyengkuyung supaya

tradhis kang ana ing dhaerah kasebut ora ilang. Saliyane saka masyarakat dhewe pamerintah uga milu nglestarakake.

Upaya pelestarian lan nguri-uri budaya dhaerah minangka kagiyatan lan tindakan kang kudu dilakoni karo para masyarakat dhaerah lan pemerintah dhaerah kabupaten Banyuwangi anggone njaga lan nglestariake budaya dhaerah. Tradhisi kang ana lan ngrembaka ing sajorne panguripan masyarakat dhaerah iku kalebu budaya lokal kang wis ana wiwit jaman biyen ing indonesia. Mligine ana ing dhaerahe dhewe-dhewe bisa ndadekake titikan utawa ciri khase saka dhaerah kasebut lan dadi titikan negara. Mula saka kuwi ritual TKK lan TK kang ana ing loro desa kang nduweni maksut padha nanging nalika nglakoni nduweni pambedha kudu diuri-uri lan dilestarekake ing jaman saiki.

PANUTUP

Dudutan

Tradhisi kebo-keboan lan Tradhisi Keboan yaiku salah sawijine tradhisi daerah kang ana ing Banyuwangi, kang tuwuhan lan ngrembaka ing rong desa yaiku desa Alasmalang kecamatan Singojuruh lan desa Aliyan kecamatan Rogojampi kabupaten Banyuwangi. TKK lan TK kalebu budaya lokal kang asale saka cerita lan kapitayane masyarakat kang kalebu crita lesan, banjur kacampur marang anane tindakan arupa tatalaku lan ubarampe kang bisa ditrima dening masyarakat desa. Tradhisi kang dipercaya lan diugemi banget karo para masyarakat desa Alasmalang lan desa Aliyan. TKK lan TK dilaksanakake saben setaun sepisan ing sasi Suro.

TKK lan TK yaiku tradhisi kang dilaksanakake kanggo ngucap rasa syukur dhumateng Gusti Kang Murbeng Dumadi lan ngruwat desa kanthi tujuwan tolak balak kang ana ing desa Alasmalang lan desa Aliyan. Saben desa uga ndhuweni crita mula bukane tradhisi kang nganti saiki dipercaya dening masyarakat desa. TKK lan TK bisa ana amarga wangsit kang ditrima kalian para sesepuh desa supaya bisa metu saka musibah kang ditampa karo warga desa.

TKK lan TK isih nggunakake tatalaku lan ubarampe kang wis gumathok wiwit jaman biyen, nanging ana ubarampe uga tatalaku kang beda amarga kapitayane masyarakat desa kang beda. Tatalaku lan ubarampe kang beda minangka wujud kapitayan lan pasarujukane masyarakat desa wiwit jaman biyen kang isih dipercaya nganti saiki. Tatalaku kanggo ngegelar acara kasebut kudu nggatekake urut-urutan yaiku persiapan lan pelaksanaane. Ubarampe utawa piranti kang digunakake ing sajrone tradhisi utawa ritual ing masyarakat.

Wujud komparasi ing sajorne TKK lan TK kang ditindakake ing rong desa yaiku desa Alasmalang lan desa Aliyan iku ana loro yaiku aspek pambeda lan aspek pepadhan. Aspek pambedane yaiku masyarakat lan papan panggonan nalika nglakoni saliyane kuwi uga ana 1) jenenge ritual tradhisi, 2) cerita sejarah mula bukane TKK lan TK, 3) sipate ritual TKK lan TK, 4) dhanyang, 5) pepundhen utawa tapal watese alam dunya lan alam ghoib, 6) wektu nglakoni, 7) pelaku kebo-keboan lan

keboan, 8) kostum, 9) urutan tatalaku, lan 10) ubarampe. Aspek pepadhan yaiku 1) kanggo ngucap rasa syukur Gusti Allah lan Dewi Sri, 2) padha-padha ditindakake ing sasi Sura lan setaun sepisan, 3) padha-padha nganggo simbol lan sipate kewan kebo, nanging ora nganggo kewan kebo, 4) padha-padha ditidakake ing sawah, 5) kanggo nyuwun udan, asil panenan kang akeh, lan supaya diadohake saka pageblug lan 6) anane para dhanyang desa. Komparasi kang ana ing sajrone ritual TKK lan TK uga nduweni maksut lan makna tartamtu kang dipercaya karo masyarakat desane dhewe-dhewe.

TKK lan TK nate mati utawa *vacum* lan ora dilaksanakake amarga alasan keyakinan lan politik. Saliyane *vacum* lan ora dilaksanakake uga desa ing kecamatan Rogojampi lan Singojuruh akeh kang ninggal lan ora nglaksanakake TKK lan TK, desa kesebut kayata desa Macan Putih, Gladag, Bayu, Watukebo, lan Lateng ing desa-desa kasebut wis ora dilaksanakake. Desa kang isih nglaksanake lan nguri-uri TKK lan TKmung desa Alasmalang lan Aliyan. Upaya pelestarian budaya dhaerah kang bisa ditindakake karo para warga desa lan masyarakat sakupengen lumantar telung unsur yaiku 1) Internalisasi upaya pelestarian kang asale saka awake dhewe. 2) Sosialisasi upaya pelestarian kang ditindakake lumantar omong-omongan lan menehi pangeruh marang kawula mudha. Lan 3) Enkulturasi upaya pelestarian kang asale saka pengaruh masyarakat liya lan pamerintah kabupaten. Upaya palestarian budaya dhaerah kang ditindakake dening pemerintah lan masyarakat desa Alasmalang lan Aliyan khususe yaiku mulai ngenalake TKK lan TK ing khalayak liya lumatar media sosial, informal, nonformal, lan formal arupa dunya pendhidhikan nggunakake vidio dhokumentasi lan cerita asal mulane TKK lan TK khususe ing kabupaten Banyuwangi.

Pamrayogi

Panliten ngenani TKK lan TK mujudake panliten kang mbuthuhake pamrayoga kanggo panliten sabanjure. Tradhisi kang ditindakake setaun pisan iki mangaribawani kanggo masyarakat. Babagan kasebut bisa tumuju ing pangaribawa becik lan ala sajrone negesake tradhisi. Sakabehe gumantung saka masyarakat lan pamikiran saben pawongan. Nanging anane tradhisi iki dikarepake supaya isih ngugemi lan nguri-uri budaya Jawa kang isih ana nganti jaman saiki. Tradhisi iki minangka wujud rasa syukur dhumateng Gusti Kang Murbeng Dumadi uga dedonga lan ngurmati para leluhur ing jaman biyen. Pakulinan kang ditindakake wiwit biyen nganti saiki nuduhake yen masyarakat tansah ngugemi lan nglestarikake budaya kanthi tumemen.

KAPUSTAKAN

- Afifuddin. 2009. *Metodologi Penelitian Kualitatif*. Bandung: Pustaka Setia.
Arikunto, Suharsimi. 2013. *Prosedur Penelitian : Suatu Pendekatan Praktik*. Jakarta : Rineka Cipta.
Azizah, Siti Lailatul Nur. 2014. *Kesenian Kuntulan Dalam Suku Using Di Banyuwangi Tahun (1950-*

- 1980): *Studi Akulturasi Antara Unsur Islam Dengan Kesenian Kuntulan*. PhD Thesis. UIN Sunan Ampel Surabaya.
- Bahry, Donna L. 1995. "Crossing Border: The Practice of Comparative Research", dalam Jarol B. Manheim dan Richard C. Rich, *Empirical Political Analysis: Research Methods in Political Science*, London: Longman Publisher.
- Depdikbud, 1997. *Studi Kasus*. Jakarta: Depdikbud.
- Endraswara, Suwardi. 2006. *Metode, Teori, Teknik Penelitian Kebudayaan*. Yogyakarta : Pustaka Widyatama.
- 2015. *Etnologi Jawa*. Yogyakarta: CAPS (Center for Academic Publishing Service)
- Hariwijaya, M. 2012. *Ngono ya ngono ning aja ngono: tafsir deskriptif filsafat & kearifan Jawa*. Yogyakarta. Elmatera.
- Herusatoto, Budiono. 2008. *Simbolisme Jawa*. Yogyakarta: Ombak
- Horton, Paul. B & Chester L. Hunt, terj: Aminuddin Eam. 1987. *Sosiologi*. Jakarta. Erlangga
- Koplan, David & Maners, Albert. A. 2002. *Teori Budaya*. Terjemahan Landung Simatupang. Yogyakarta: Pustaka Pelajar.
- Kuntjara, Esther. 2006. *Penelitian Kebudayaan*. Yogyakarta: Graha Ilmu
- Kuntowijoyo. 1987. *Masyarakat dan Budaya*. Yogyakarta: Tiara Wicana.
- Koentjaraningrat. 1985. *Kebudayaan, Mentalis dan Pembangunan*. Jakarta: Gramedia.
- 1990. Pengantar Ilmu Antropologi. Jakarta: Aksara Baru.
- 1987. *Pengantar Hukum Adat Kebudayaan Mentalis dan Pembangunan*. Jakarta: Gramedia
- 2010. *Manusia dan Kebudayaan Indonesia*. Jakarta: Djambatan
- Lijphart, Arend. 1975. "The Comparable-Cases Strategy in Comparative Research", dalam : *Comparative Political Studies*. Sage Publications Inc.
- Moleong, Lexy J. 2009. *Metodologi Penelitian Kualitatif*. Bandung: PT. Remaja Rosdakarya.
- Nazir, Moh. 2005. *Metode Penelitian*. Jakarta: Ghalia Indonesia.
- Poerwadarminto. 1984. *Kamus Umum Bahasa Indonesia*. Jakarta: Balai Pustaka.
- Sobur, Alex. 2004. *Analisis Teks Media* Bandung: Remaja Rosdakarya
- Sudikan, Setya Yuwana. 2001. *Metode Penelitian Kebudayaan*. Surabaya: UNESA Unipress dan Citra Wacana.
- Sugiyono, 2009, *Metode Penelitian Kuantitatif, Kualitatif dan R&D*, Bandung : Alfabetika.
- Sukarmen. 2006. *Pengantar Kebudayaan Jawa*. Surabaya: Unesa Unipress.
- Sutarto, Ayu dan Sudikan, Setya Yunawan. 2008. *Pemetaan Kebudayaan Di Provinsi Jawa Timur Sebuah Upaya Pencarian Nilai-Nilai Positif*. Jember : Biro Mental Spiritual.
- Sutarto, Ayu. 2010. *Kamus Budaya Dan Religi Using*. Jember : Lembaga Pendidikan Uneversitas Jember.
- Suwarni dan Widayati, Sri Wahyu. 2011. *Dasar-dasar Upacara Adat Jawa*. Surabaya: Penerbit Bintang.
- Syaiful, Moh dkk. 2015. *Jagat Osing Seni, Tradisi Dan Kearifan Lokal Osing*. Banyuwangi. Lembaga Masyarakat Adat Osing
- Tim Penyusun. 2003. *Kamus Besar Bahasa Indonesia*. Jakarta : Pustaka Jaya-Girimustik Pasaka

SUMBER INTERNET

<Http://e-journal.uajy.ac.id/8883/3/2mts02204.pdf>
(diakses 14 Oktober 2018, 11.00 WIB)

<http://jurnalmahasiswa.unesa.ac.id/index.php/avatara/article/view/1132/830> (diakses 14 Oktober 2018, 11.00 WIB)

<http://digilib.uinsby.ac.id/17243/4/bab%201.pdf> (diakses 14 Oktober 2018, 11.00 WIB)

<https://anzdoc.com/35-ii11-budaya-arek-menurut-ayu-sutarto-komunitas-arek-terke.html> (diakses 18 November 2018, 20.00 WIB)

<https://anzdoc.com/queue/suku-osing-banyuwangi.html>
(diakses 20 Januari 2019, 11.00 WIB)

